

Utusan Malaysia Mac 2018

Bil.	Tarikh	Tajuk Berita	Catatan	Muka Surat
1.	3 Mac 2018	Terima suapan: Datuk direman empat hari	Suruhanjaya Pencegahan Rasuah Malaysia (SPRM)	4
2.	4 Mac 2018	Terowong: Kontroversi yang semakin nyata	Suruhanjaya Pencegahan Rasuah Malaysia (SPRM)	5
3.	5 Mac 2018	SPRM tahan jurutera, isteri minta rasuah RM361,000	Suruhanjaya Pencegahan Rasuah Malaysia (SPRM),	7
4.	5 Mac 2018	Syarikat perkapalan milik GLC terlibat rasuah RM108.5 juta disiasat	Suruhanjaya Pencegahan Rasuah Malaysia (SPRM)	8
5.	6 Mac 2018	Salah guna kuasa, rasuah RM108.5 juta Sembilan saksi dirakam percakapan	Suruhanjaya Pencegahan Rasuah Malaysia (SPRM)	9
6.	8 Mac 2018	Tanah Ijok: Pihak ketiga nikmati RM260j ? SPRM wajar siasat transaksi jualan untuk kesan aliran wang	Suruhanjaya Pencegahan Rasuah Malaysia (SPRM)	10
7.	9 Mac 2018	Bekas pengarah Jabatan Kejururawatan bebas tuduhan rasuah	Suruhanjaya Pencegahan Rasuah Malaysia (SPRM)	12
8.	10 Mac 2018	Terowong PP: Datuk Seri bebas reman	Suruhanjaya Pencegahan Rasuah Malaysia (SPRM)	13
9.	12 Mac 2018	SPRM berkerjasama dengan perunding bebas	Suruhanjaya Pencegahan Rasuah Malaysia (SPRM)	14
10.	12 Mac 2018	Laporan audit, dokumen berkaitan tanah Felda tidak boleh didedah	Suruhanjaya Pencegahan Rasuah Malaysia (SPRM)	16
11.	12 Mac 2018	Bekas pengarah, bekas pembantu Petronas Carigali didakwa	Suruhanjaya Pencegahan Rasuah Malaysia (SPRM)	17
12.	12 Mac 2018	Projek dasar laut di Pulau Pinang masih dalam siasatan SPRM	Suruhanjaya Pencegahan Rasuah Malaysia (SPRM)	18
13.	14 Mac 2018	RM430j bukan wang 1MDB!	1MDB	19
14.	14 Mac 2018	7 penguat kuasa MPK ditahan terima rasuah RM1,000	Suruhanjaya Pencegahan Rasuah Malaysia (SPRM)	21
15.	15 Mac	Bekas pengurus dijel, denda, mengaku cuba	Suruhanjaya Pencegahan	22

Bil.	Tarikh	Tajuk Berita	Catatan	Muka Surat
	2018	terima rasuah	Rasuah Malaysia (SPRM)	
16.	15 Mac 2018	Dua lelaki didakwa beri suapan kepada penguat kuasa SWCorp	Suruhanjaya Pencegahan Rasuah Malaysia (SPRM)	24
17.	16 Mac 2018	2 bekas pegawai kanan Felda diperintah bela diri Dituduh pecah amanah libatkan dana lebih RM47 juta	Suruhanjaya Pencegahan Rasuah Malaysia (SPRM)	25
18.	18 Mac 2018	SPRM digesa siasat pengurusan air di Selangor	Suruhanjaya Pencegahan Rasuah Malaysia (SPRM)	27
19.	20 Mac 2018	Skandal Air: Mahkamah tetapkan bicara pada 3 April	Timbalan Pendaftar Dana Arabi Wazani	28
20.	21 Mac 2018	SPRM tahan 6 individu Termasuk dua bergelar Datuk berhubung isu tanah Ijok	Suruhanjaya Pencegahan Rasuah Malaysia (SPRM)	30
21.	21 Mac 2018	Jam tangan mewah, barang kemas jenama Cartier jadi barang bukti	Suruhanjaya Pencegahan Rasuah Malaysia (SPRM)	32
22.	21 Mac 2018	Dipenjara lapan bulan Bekas pengarah DBKL bersalah 8 tuduhan guna kedudukan	Bekas Pengarah Eksekutif (Pengurusan Projek) Dewan Bandaraya Kuala Lumpur (DBKL), Datuk Seri Syed Afendy Ali Syed Abid Ali	34
23.	22 Mac 2018	SPRM buka 40 kertas siasatan penjawat awam di Perak	Suruhanjaya Pencegahan Rasuah Malaysia (SPRM)	36
24.	22 Mac 2018	Tanah Ijok: Seorang lagi suspek bergelar Datuk direman	Suruhanjaya Pencegahan Rasuah Malaysia (SPRM)	38
25.	24 Mac 2018	Skandal tanah Ijok: Tempoh reman empat suspek disambung, dua lagi bebas	Suruhanjaya Pencegahan Rasuah Malaysia (SPRM)	40
26.	25 Mac 2018	Isu tanah Ijok: Azmin jangan hanya berdiam diri	Suruhanjaya Pencegahan Rasuah Malaysia (SPRM)	41
27.	26 Mac 2018	SPRM tahan Pengarah Jabatan Perkhidmatan Veterinar Perlis	Suruhanjaya Pencegahan Rasuah Malaysia (SPRM)	44
28.	27 Mac 2018	Guan Eng, Li Koon didakwa	Suruhanjaya Pencegahan Rasuah Malaysia (SPRM)	45

Bil.	Tarikh	Tajuk Berita	Catatan	Muka Surat
		SPRM akan buktikan mereka tandatangan jual beli harta tanah, banglo		
29.	27 Mac 2018	Pengarah perkhidmatan veterinar Perlis direman empat hari	Suruhanjaya Pencegahan Rasuah Malaysia (SPRM)	47
30.	29 Mac 2018	Bekas koperal tentera pecah amanah dijel 30 bulan, 79 sebatan	Suruhanjaya Pencegahan Rasuah Malaysia (SPRM)	49
31.	30 Mac 2018	DBKL disaran audit jejantas awam	Dewan Bandaraya Kuala Lumpur (DBKL)	51

3 Mac 2018

1. Terima suapan: Datuk direman empat hari

PUTRAJAYA 3 Mac - Seorang ahli perniagaan bergelar Datuk direman empat hari kerana disyaki terlibat menerima wang RM3 juta bagi menutup kes siasatan projek mega terowong dasar laut bernilai RM6.3 bilion di Pulau Pinang.

Perintah reman dikeluarkan oleh Majistret Eng Kar Wen selepas membenarkan permohonan Suruhanjaya Pencegahan Rasuah Malaysia (SPRM) untuk menyiasat lelaki berkenaan sehingga 6 Mac ini.

Suspek itu merupakan individu kedua yang direman membabitkan kes menerima wang suapan kononnya untuk menutup kes siasatan SPRM terhadap skandal projek mega terowong dasar Pulau Pinang.

Beliau ditahan SPRM di sekitar ibu negara pada pukul 3.30 petang semalam.

Menurut sumber, suspek yang juga seorang ahli perniagaan berusia 64 tahun itu menerima wang berjumlah RM3 juta menerusi empat transaksi pada tahun lalu.

Kata sumber itu lagi, suspek pada mulanya menerima suapan RM4 juta sebagai habuan, namun jumlah itu dikurangkan kepada RM3 juta selepas rundingan dilakukan.

Pada Rabu lalu, seorang lelaki bergelar Datuk Seri berumur 37 tahun direman enam hari sehingga 5 Mac ini kerana dipercayai menerima suapan RM19 juta membabitkan kes sama.

2. Terowong: Kontroversi yang semakin nyata

SELEPAS berhempas-pulas cuba untuk memperlihatkan kononnya projek terowong dasar laut bersih dan tidak terpalit sebarang kontroversi, akhirnya syarikat pemaju terbabit sendiri yang membuka pekung di dada.

Dakwaan membayar sebanyak RM22 juta kepada pihak tertentu untuk menutup siasatan Suruhanjaya Pencegahan Rasuah Malaysia (SPRM) secara tidak langsung menunjukkan ada sesuatu yang cuba disembunyikan.

Secara logiknya, adakah syarikat pemaju berkenaan sanggup membayar sehingga RM22 juta untuk menutup siasatan SPM sekiranya projek terowong dasar laut itu sememangnya melalui transaksi urus niaga yang benar-benar cekap, telus dan akauntabiliti?

Seperti biasa, Kerajaan DAP Pulau Pinang mengambil sikap lepas tangan dan mendakwa langsung tidak mengetahui tentang pembayaran yang dibuat oleh syarikat pemaju berkenaan.

Walaupun kedengaran mustahil kerana Kerajaan DAP Pulau Pinang sepatutnya memantau aktiviti syarikat yang dianugerahkan projek itu, namun kerajaan negeri perlu diberi peluang untuk mendengar maklum balas daripada syarikat berkenaan seperti diminta Ketua Menteri, Lim Guan Eng.

Dari awal lagi, projek terowong dasar laut yang dirancang Kerajaan DAP Pulau Pinang itu sarat dengan tanda-tanya.

Bermula dari kos pembinaannya yang disifatkan luar biasa mahal sehingga lebih RM6 bilion, sehinggalah kepada perjanjian dan penganugerahan projek itu kepada syarikat pemaju, semuanya menimbulkan keraguan dan persoalan yang sukar dijawab.

Sebab itu siasatan Suruhanjaya Pencegahan Rasuah Malaysia (SPRM) merupakan langkah paling tepat dan adil untuk merungkai kontroversi di sebalik projek mega tersebut.

Kerajaan DAP Pulau Pinang pula sepatutnya memberi ruang dan bekerjasama dalam siasatan SPM berhubung projek ini.

Kerana seperti kebanyakan pihak lain, mereka juga memerlukan jawapan memandangkan kredibiliti dan integriti kepemimpinan kerajaan negeri turut terpalit dalam kontroversi ini.

Tindakan menyerang SPM kononnya berat sebelah atau dwi standard dan menjalankan siasatan berteraskan politik tidak mampu menutup keraguan dalam projek tersebut.

Ini kerana dari sehari ke sehari, semakin banyak kepincangan dalam projek terowong dasar laut itu terdedah kepada umum dan dinilai dengan teliti oleh penduduk Pulau Pinang.

Untuk kesekian kalinya, Kerajaan DAP Pulau Pinang perlu menerima hakikat dan akur siasatan SPRM terhadap skandal terowong bukan bermotif politik.

Sebaliknya, tindakan SPRM adalah didorong oleh bukti-bukti yang jelas dan nyata yang bukan hanya bersumberkan pihak luar, tetapi daripada tindakan syarikat pemaju projek terowong dasar laut itu sendiri.

Dari pada terus menghentam SPRM, adalah lebih baik Kerajaan DAP Pulau Pinang menyiapkan diri dan bersedia dengan bukti lebih kukuh kerana skandal projek terowong dasar laut itu semakin hari semakin terbuka luas.

5 Mac 2018

3. SPRM tahan jurutera, isteri minta rasuah RM361,000

KUALA LUMPUR 5 Mac - Suruhanjaya Pencegahan Rasuah Malaysia (SPRM) menahan seorang jurutera bersama isterinya kerana disyaki meminta serta menerima rasuah kira-kira RM361,000 daripada syarikat kontraktor mengenai projek Sabah Ammonia Urea (Samur), Sabah, tiga tahun lalu.

Menurut sumber, jurutera tersebut yang bertugas di Petronas Chemical Group dan isterinya dipercayai berbuat demikian bagi melakukan kerja pengujian terhadap paip-paip yang dipasang di projek Samur di Sipitang.

Sumber berkata, pasangan suami isteri tersebut masing-masing berusia 58 tahun dan 49 tahun ditahan di rumah mereka pada pukul 2 petang di Shah Alam, Selangor.

"Suspek yang merupakan pengurus kawalan kualiti dan analisis kualiti projek tersebut ketika itu disyaki meminta serta menerima rasuah sebagai upah melantik syarikat sub-kontraktor kepada kontraktor utama bagi menjalankan kerja tersebut.

"Pembayaran rasuah itu dimasukkan ke dalam akaun peribadi suspek dan akaun syarikat isterinya sebagai upah bagi melantik syarikat berkenaan dalam melaksanakan projek tersebut," katanya, di sini hari ini.

Sementara itu, Pengarah Kanan Jabatan Siasatan SPRM, Datuk Simi Abd. Ghani ketika dihubungi mengesahkan penahanan itu dan memaklumkan bahawa pihaknya sedang menjalankan siasatan di bawah Seksyen 16 (a)(A) Akta SPRM 2009.

"Setakat ini pihak kami telah membuka dua kertas siasatan berhubung kes itu dan 12 rakaman pernyataan diambil daripada individu-individu berkaitan," ujarnya.

5 Mac 2018

4. Syarikat perkапalan milik GLC terlibat rasuah RM108.5 juta disiasat

KUALA LUMPUR 5 Mac- Suruhanjaya Pencegahan Rasuah Malaysia (SPRM) merakam percakapan sembilan individu termasuk empat pegawai MISC Bhd., bagi membantu siasatan berhubung tuntutan palsu serta salah guna kuasa berjumlah USD27.8 juta (RM108.5 juta).

Menurut sumber, pihaknya turut merampas beberapa dokumen berkaitan tuntutan palsu dan rasuah tentang kerja-kerja penyelenggaraan syarikat milik kerajaan (GLC) terbabit.

Kata sumber, pihak SPM melakukan serbuan terhadap syarikat-syarikat berkaitan pada 28 Februari lalu di ibu negara dan Johor.

"Kita menerima maklumat bahawa ada pegawai terbabit dipercayai bersubahat dengan kontraktor mengemukakan tuntutan palsu mengenai kerja-kerja penyelenggaraan kapal milik GLC tersebut iaitu perkara tersebut tidak dilaksanakan sejak 2010 hingga 2013.

"Ada beberapa dakwaan yang kini disiasat SPM. Antaranya tuntutan pembayaran kos pembaikan tangki kapal bernilai USD15.8 juta (RM61.6 juta) pada 2012 sedangkan anggaran awal hanyalah USD7.9 juta (RM30.8 juta)," katanya, di sini hari ini.

Menurut sumber selain itu, terdapat dakwaan mengenai kerja penyelenggaraan kapal mengalami kerugian sebanyak USD12 juta (RM46.8 juta) kerana proses pelantikan kontraktor tidak mengikut prosedur perolehan yang ditetapkan," katanya.

Sementara itu, Timbalan Ketua Pesuruhjaya (Operasi) SPM, Datuk Seri Azam Baki ketika dihubungi mengesahkan siasatan melibatkan GLC tersebut, bagaimanapun enggan mengulas lanjut kerana khuatir akan mengganggu siasatan yang sedang dijalankan.

6 Mac 2018

5. Salah guna kuasa, rasuah RM108.5 juta

Sembilan saksi dirakam percakapan

KUALA LUMPUR 5 Mac - Tuntutan pembayaran kos pemberian tangki kapal bernilai AS\$15.8 juta (RM61.6 juta) pada 2012 sedangkan anggaran awal hanyalah AS\$7.9 juta (RM30.8 juta).

Itu satu daripada dua dakwaan disiasat Suruhanjaya Pencegahan Rasuah Malaysia (SPRM) yang mempunyai kaitan dengan sebuah syarikat perkapalan milik syarikat kerajaan (GLC), MISC Bhd., selepas disyaki terlibat perbuatan rasuah dan salah guna kuasa melibatkan wang dianggarkan lebih AS\$27.8 juta (RM108.5 juta).

Menurut sumber, pihak SPM menerima maklumat terdapat pegawai di MISC Bhd., disyaki bersubahat dengan beberapa kontraktor mengemukakan tuntutan palsu berkaitan kerja penyelenggaraan kapal milik syarikat berkenaan tetapi tidak dilaksanakan sejak 2010 hingga 2013.

Jelas sumber itu, serbuan terhadap beberapa syarikat berkaitan telah dilakukan di ibu negara dan Johor pada 28 Februari lalu.

"Seramai sembilan orang saksi termasuk empat pegawai kanan MISC Bhd., diambil keterangan serta beberapa dokumen berkaitan turut dirampas.

"Dalam kes itu, pihak SPM juga menyiasat dakwaan mengenai kerja penyelenggaraan kapal yang mengalami kerugian sebanyak AS\$12 juta (RM46.8 juta) kerana proses pelantikan kontraktor tidak mengikut prosedur perolehan ditetapkan," katanya di sini hari ini.

Timbalan Ketua Pesuruhjaya (Operasi) SPM, Datuk Seri Azam Baki ketika dihubungi mengesahkan siasatan melibatkan GLC tersebut namun enggan mengulas lanjut.

Beliau berkata, pihaknya khuatir akan mengganggu siasatan yang sedang dijalankan.

6. Tanah Ijok: Pihak ketiga nikmati RM260j ?

SPRM wajar siasat transaksi jualan untuk kesan aliran wang

KUALA LUMPUR 8 Mac - Penyelesaian skandal tanah di Ijok, Selangor oleh kerajaan negeri terus menimbulkan keraguan ekoran timbul dakwaan terdapat pihak ketiga menikmati kira-kira RM260 juta hasil jualan tanah berkenaan tanpa alasan yang jelas.

Berdasarkan maklumat yang dikongsi oleh Pengasas Solidariti Anak Muda Malaysia (SAMM), Badrul Hisham Shaharin dalam akaun media sosial beliau beberapa hari lalu, penganalisis politik, Lim Sian See mempersoalkan pembayaran tersebut sedangkan RM1.18 bilion hasil jualan tanah itu sepatutnya diagihkan kepada peneroka tanah serta syarikat pemaju bagi melangsankannya hutang.

Menurut maklumat yang tular dalam media sosial itu, penerima bayaran tersebut yang dianggap sebagai pihak ketiga ialah Hadrons Consulting Sdn. Bhd., Hadrons Capital Sdn. Bhd., FOS Advisory Services Sdn. Bhd., Yvonne Wong Yee Woon, Thangaraj Associates, K&A Management Sdn. Bhd. dan Abraham Ooi & Partners.

Sian See mempertikaikan mengapa kesemua mereka dibayar dengan jumlah hampir menyamai nilai RM300 juta yang diterima oleh peneroka tanah.

"Apakah tujuan jumlah ini dibayar kepada pihak ketiga sedangkan mereka bukannya perlu menyelesaikan hutang-hutang bank atau membayar tuntutan peneroka.

"Adakah mereka ini terdiri daripada syarikat perunding, syarikat penasihat atau syarikat pengurusan," soalnya menerusi status akaun Facebook beliau semalam.

Dakwa beliau lagi, berdasarkan beberapa laporan media minggu lalu, wakil kerajaan negeri Selangor memberitahu sebanyak RM300 juta dibayar kepada peneroka manakala RM880 juta lagi kepada syarikat-syarikat pemaju asal termasuk untuk melangsankannya segala pinjaman dan tuntutan.

Namun dakwanya, berdasarkan maklumat dalam media sosial kelihatan seperti RM260 juta daripada RM880 juta itu telah digunakan untuk membayar pihak ketiga yang terdiri daripada tujuh pihak yang telah didekahkan.

"Apakah yang berlaku kepada baki RM620 juta lagi dan adakah jumlah itu turut digunakan untuk membayar pihak ketiga yang lain," soalnya lagi.

Justeru, bagi merungkai segala risiko berlakunya penyelewengan wang tersebut, Sian See gembira seandainya transaksi jualan tanah itu disiasat oleh Suruhanjaya Pencegahan Rasuah Malaysia (SPRM) untuk mengesan aliran baki wang itu disalurkan.

Beliau berkata, perkara itu mungkin perlu diberikan perhatian lebih-lebih lagi segala maklumat itu didedahkan oleh Badrul Hisham yang mengikuti skandal tanah Ijok sejak berbulan-bulan lalu termasuk tindakannya menyerahkan beberapa bukti kepada SPM berhubung transaksi jualan tanah itu.

9 Mac 2018

7. Bekas pengarah Jabatan Kejururawatan bebas tuduhan rasuah

KUALA LUMPUR 9 Mac - Seorang bekas Pengarah Jabatan Kejururawatan Kementerian Kesihatan menarik nafas lega apabila Mahkamah Sesyen di sini hari ini melepas dan membebaskannya daripada pertuduhan menyalahgunakan kuasa bagi mendapatkan suapan berhubung kerja-kerja penambahbaikan portal jabatan berkenaan kepada syarikat milik anaknya, empat tahun lalu.

Hakim Azura Alwi memutuskan demikian terhadap S. Tselvin, 61, selepas pihak pembelaan berjaya membuktikan keraguan munasabah terhadap kes pendakwaan.

"Mahkamah mendapati keterangan tertuduh adalah konsisten dari awal dan bukannya bersifat penafian semata-mata atau bukanlah yang difikirkan semula. Mahkamah juga mendapati tertuduh tidak mempunyai sebarang kepentingan terhadap syarikat Fort Mark Sdn. Bhd., walaupun syarikat itu milik anaknya," katanya.

Ketika keputusan dibacakan, Tselvin yang memakai pakaian sut Punjabi berwarna kuning kelihatan menangis teresak-esak di kandang tertuduh sambil meraup mukanya tanda bersyukur dengan keputusan tersebut. Tselvin yang diwakili peguam S. Devanandan dibicarakan selepas mengaku tidak bersalah atas tuduhan tersebut pada 24 Julai 2015.

Mengikut pertuduhan, dia didakwa menggunakan kedudukannya untuk mendapatkan suapan apabila mengambil tindakan sehingga syarikat Fort Mark dipilih untuk melaksanakan kerja-kerja penambahbaikan Portal Nursing di bahagian Kejururawatan kementerian dengan harga RM12,300 sedangkan dia mempunyai kepentingan kepada pengarah syarikat tersebut yang juga anaknya, R. Pravin walaupun pada ketika itu syarikat berkenaan masih belum ditubuhkan.

Wanita itu yang bersara wajib pada 28 Ogos tahun lalu didakwa melakukan kesalahan tersebut di bahagian Kejururawatan Kementerian Kesihatan, Putrajaya antara 13 dan 15 Oktober 2014.

Pendakwaan dikendalikan oleh Timbalan Pendakwa Raya dari Suruhanjaya Pencegahan Rasuah Malaysia (SPRM), Nor Diana Nor Azwa mengikut Seksyen 23 Akta SPRM 2009 dan boleh dihukum di bawah Seksyen 24 akta sama yang memperuntukkan hukuman penjara maksimum 20 tahun dan denda lima kali ganda nilai suapan atau RM10,000, mengikut mana yang lebih tinggi.

Seramai 21 saksi pendakwaan dan seorang saksi pembelaan iaitu tertuduh telah dipanggil memberi keterangan sepanjang perbicaraan yang bermula pada 21 April 2016.

10 Mac 2018

8. Terowong PP: Datuk Seri bebas reman



AHLI perniagaan bergelar Datuk Seri yang direman kerana dipercayai menerima wang RM19 juta bagi menutup kes projek mega terowong dasar laut bernilai RM6.3 bilion di Pulau Pinang dibebaskan hari ini

PUTRAJAYA 10 Mac - Ahli perniagaan bergelar Datuk Seri yang direman kerana dipercayai menerima wang RM19 juta bagi menutup kes projek mega terowong dasar

laut bernilai RM6.3 bilion di Pulau Pinang dibebaskan hari ini.

Majistret Lee Hong Shi membenarkan lelaki itu dibebaskan dengan jaminan RM150,000 berserta seorang penjamin.

Suspek itu sebelum ini direman selama 11 hari sejak 28 Februari lalu.

Menurut sumber, suspek yang merupakan suami kepada seorang pemimpin pertubuhan bukan kerajaan (NGO) dipercayai menerima wang suapan RM19 juta daripada syarikat pembinaan utama projek selepas dikatakan mampu menyelesaikan siasatan dilakukan SPRM.

Dakwa sumber lagi, pihak syarikat berkenaan membayar wang berjumlah RM19 juta itu secara berperingkat antara Julai dan Ogos tahun lalu.

Sebelum ini, projek berkenaan menerima bantahan pelbagai pihak dan mencetuskan pelbagai kontroversi antaranya berhubung kos kajian kebolehlaksanaan yang terlalu tinggi selain kaedah pembayaran melibatkan pertukaran tanah Kerajaan DAP Pulau Pinang.

9. SPRM berkerjasama dengan perunding bebas

Menteri Kemajuan Luar Bandar dan Wilayah (KKLW), Datuk Seri Ismail Sabri Yaakob (tiga, kiri) menyaksikan pertukaran dokumen ikrar bebas rasuah yang disampaikan oleh Ketua Setiausaha, Datuk Borhan Dolah (dua, kiri) kepada Timbalan Ketua Pesuruhjaya (Operasi) SPRM, Datuk Seri Azam Baki pada Majlis Perhimpunan Bulanan dan Ikrar Bebas Rasuah KKLW hari ini.

PUTRAJAYA 12 Mac - Suruhanjaya Pencegahan Rasuah Malaysia (SPRM) sedang bekerjasama dengan perunding bebas bagi membuat penilaian berhubung kos kajian kebolehlaksanaan projek terowong dasar laut di Pulau Pinang.

Timbalan Ketua Pesuruhjaya (Operasi) SPRM Datuk Seri Azam Baki berkata, pihaknya juga mendapatkan pandangan Jabatan Kerja Raya (JKR) memandangkan siasatan kes itu membabitkan banyak aspek teknikal.

"Siasatan kes ini masih berjalan dan kita sedang bekerjasama dengan beberapa perunding bebas selain perbincangan berterusan dengan perunding-perunding dari agensi kerajaan.

"Kita juga berbincang dengan perunding kerajaan negeri bagi mengumpul data dan perkara berkaitan kerana semua maklumat itu diperlukan ketika berurusan dengan perunding bebas yang dipilih," katanya tanpa mendedahkan tentang perunding bebas tersebut.

Beliau berkata demikian pada sidang akhbar selepas majlis Ikrar Bebas Rasuah (IBR) bersama Kementerian Kemajuan Luar Bandar dan Wilayah sempena perhimpunan bulanan kementerian itu di sini, hari ini.

Majlis itu dihadiri menteri berkenaan, Datuk Seri Ismail Sabri Yaakob.

Sebelum ini, Azam dilaporkan berkata, SPRM dalam proses mendapatkan khidmat perunding bebas untuk membuat penilaian berhubung kos kajian kebolehlaksanaan bagi projek melibatkan tiga jalan utama dan terowong dasar laut di Pulau Pinang yang dianggar bernilai RM6.3 bilion.

Projek itu disiasat SPRM kerana didakwa melibatkan kos kajian kebolehlaksanaan yang tinggi dan kaedah pembayaran melibatkan pertukaran tanah kerajaan negeri, selain berlaku kelewatan pembinaan selama 22 bulan.

Dalam perkembangan lain, Azam berkata pihaknya sedang berkomunikasi dengan Bukit Aman bagi mendapatkan maklumat berhubung siasatan polis terhadap Pengarah Jabatan Siasatan Jenayah Bukit Aman Datuk Seri Wan Ahmad Najmuddin Mohd.

Selain maklumat yang diperoleh secara terbuka melalui artikel yang ditulis di luar negara serta kenyataan Ketua Polis Negara Tan Sri Mohamad Fuzi Harun, SPRM juga perlu mendapatkan penerangan lebih jelas mengenai siasatan yang dijalankan polis berhubung wang sebanyak AUD\$320,000 (RM972,000) yang didepositkan ke akaun bank di bawah nama Wan Ahmad Najmuddin di Australia.

10. Laporan audit, dokumen berkaitan tanah Felda tidak boleh didedah**Razali Ibrahim**

KUALA LUMPUR 12 Mac - Laporan audit forensik bagi projek Kuala Lumpur Vertical City (KLVC) dan 240 dokumen yang terlibat dalam kajian audit berkenaan tidak boleh didedahkan kerana siasatan masih dilakukan.

Timbalan Menteri di Jabatan Perdana Menteri, Datuk Seri Razali Ibrahim berkata, kesemua dokumen itu termasuk syor-syor yang dijangka diberi, telah diminta oleh polis dan Suruhanjaya Pencegahan Rasuah (SPRM) untuk digunakan sebagai dokumen siasatan.

"Laporan audit tak boleh didedahkan kerana siasatan masih berlangsung dan kita akan pastikan perkara (yang timbul) berkaitan ini (projek KLVC) tidak akan berulang dengan memastikan kesemua jabatan kerajaan dan agensi berkaitan mematuhi perintah am.

"Apa yang berlaku di Felda adalah satu pengajaran yang amat besar. Saya setuju kita tak boleh biarkan perkara ini berulang dan saya boleh beri jaminan tidak ada jabatan yang boleh terlepas daripada kajian (pemantauan) audit sebenarnya," katanya menjawab soalan tambahan Tan Sri Muhyiddin Mohd Yassin (PPBM-Pagoh) pada sidang Dewan Rakyat, hari ini.

KLVC ialah projek yang dibangunkan syarikat pemaju, Synergy Promenade Sdn Bhd (SPSB), di tanah milik Felda yang menimbulkan kontroversi baru-baru ini.

Pada 9 Mac lepas, Pengurus Felda Tan Sri Shahrir Abdul Samad berkata Felda kembali mendapatkan kesemua 16 lot tanahnya di Jalan Semarak di sini, yang sebelum ini didaftarkan atas nama SPSB.

12 Mac 2018

11. Bekas pengarah, bekas pembantu Petronas Carigali didakwa

KUALA LUMPUR 12 Mac - Seorang bekas pengarah syarikat cari gali minyak dan bekas pembantu teknikal di Petronas Carigali Sdn. Bhd. dihadapkan ke Mahkamah Sesyen di sini hari ini atas tiga pertuduhan membuat tuntutan yang mengandungi butiran palsu dalam urusan kerja-kerja cari gali melibatkan wang berjumlah hampir RM20 juta, tiga tahun lalu.

Yong Mee Lan, 54, dan Ahmad Ashraf Kamarul Zaman, 29, masing-masing membuat pengakuan tidak bersalah selepas kesemua pertuduhan dibacakan terhadap mereka di hadapan Hakim Madihah Harullah.

Mengikut pertuduhan pertama dan kedua, mereka dengan niat bersama didakwa telah memberikan Ketua Projek di Petronas Carigali Sdn. Bhd., Saiful Adli Ismail melalui sistem SAP dua dokumen iaitu tuntutan 'request order' berjumlah RM14 juta yang mengandungi butiran palsu iaitu tuntutan bagi 'Operation Day Rate' bagi tempoh kerja antara 23 Januari 2015 dan 21 Februari 2015 bertujuan untuk mengelirukan Saiful Adli.

Bagi pertuduhan ketiga, kedua-dua tertuduh didakwa melakukan perbuatan sama dan telah mengemukakan tuntutan itu melalui empat request order berjumlah RM6 juta antara 23 Januari 2015 dan 23 Mac tahun sama bagi tujuan mengelirukan Saiful Adli.

Kesemua perbuatan itu didakwa dilakukan di pejabat Petronas Carigali, di sini antara 24 Mac 2015 dan 20 April 2015.

Pendakwaan dikendalikan oleh Timbalan Pendakwa Raya Suruhanjaya Pencegahan Rasuah Malaysia (SPRM), Mohammad Heikal Ismail.

Mahkamah membenarkan kedua-dua tertuduh masing-masing diikat jamin RM500,000 dengan seorang penjamin berserta syarat tambahan pasport perlu diserah kepada mahkamah selain 16 April ini untuk sebutan semula kes.

12 Mac 2018

12. Projek dasar laut di Pulau Pinang masih dalam siasatan SPRM

PUTRAJAYA 12 Mac - Suruhanjaya Pencegahan Rasuah Malaysia (SPRM) masih menjalankan siasatan berhubung projek terowong dasar laut di Pulau Pinang dengan bantuan pihak konsultan daripada agensi kerajaan.

Timbalan Ketua Pesuruhjaya Operasinya, Datuk Seri Azam Bakri berkata, proses tersebut dilakukan bagi mendapatkan data terperinci bagi menilai kajian kebolehlaksanaan projek terowong dasar laut di negeri itu.

"Siasatan mengenai projek ini masih dijalankan dengan bantuan konsultan agensi kerajaan seperti Jabatan Kerja Raya (JKR) dan lain-lain.

"SPRM akan mendapatkan nasihat daripada agensi ini terlebih dahulu, sekiranya mereka menasihatkan kita berhubung dengan konsultan swasta, SPRM akan berbuat demikian," katanya dalam sidang akhbar selepas menghadiri majlis Ikrar Bebas Rasuah Kementerian Kemajuan Luar Bandar dan Wilayah (KKLW) di sini hari ini.

Yang hadir sama, Menteri Kemajuan Luar Bandar dan Wilayah, Datuk Seri Ismail Sabri Yaakob dan Ketua Setiausaha KKLW, Datuk Borhan Dolah.

Baru-baru ini, SPRM mengumumkan mereka dalam proses melantik beberapa pihak teknikal atau konsultan bagi menilai kajian kebolehlaksanaan projek terowong dasar laut di Pulau Pinang itu.

SPRM menjelaskan kes seumpama itu melibatkan hal-hal teknikal dan mengambil masa untuk disiasat.

13. RM430j bukan wang 1MDB!

KUALA LUMPUR 14 Mac - Wang berjumlah CHF104 juta (RM430 juta) yang sedang dipertimbangkan oleh penggubal undang-undang Switzerland untuk dipulangkan tidak boleh dituntut oleh 1Malaysia Development Bhd (1MDB) kerana wang itu bukan milik mereka.

Menurut 1MDB, Pihak Berkuasa Pasaran Kewangan Switzerland (FINMA) sendiri menyatakan bahawa hanya mereka yang `terjejas secara langsung` oleh tindakan perantara kewangan di Switzerland sahaja yang boleh menuntut sebahagian daripada denda itu dan tuntutan tersebut hanya boleh dibuat melalui proses undang-undang.

"Kami (1MDB) juga mengulangi kenyataan sebelum ini yang kami tidak kehilangan sebarang wang dan semua wangnya diambil kira sepenuhnya," katanya dalam kenyataan di sini hari ini.

Kenyataan itu adalah merujuk kepada surat yang dihantar oleh Ahli Parlimen pembangkang, Lim Kit Siang dan Datuk Seri Dr. Wan Azizah Wan Ismail kepada ahli-ahli Perhimpunan Persekutuan Switzerland berhubung usul yang dibahaskan dalam Majlis Kebangsaan (Dewan Rakyat) Perhimpunan Persekutuan.

Wan Azizah dan Kiat Siang menggesa Ahli-ahli Parlimen Swiss memulangkan wang itu, yang didakwa daripada hasil kutipan 1MDB, yang disita oleh kerajaan Switzerland.

Mengulas usul Repatriation of Corruption Funds to the Robbed Populations bertarikh 16 Jun 2017 yang dikemukakan oleh Ahli Parlimen Switzerland, Carlo Sommaruga di Majlis Kebangsaan, 1MDB menjelaskan, ia dinyatakan secara umum dan menyebut nama pelbagai syarikat dan negara.

"Ia bukan usul khusus mengenai 1MDB atau Malaysia. Pada 30 Ogos 2017, Majlis Persekutuan Switzerland mengeluarkan analisis terperinci tentang usul itu dan Kabinet Swiss mencadangkan usul ditolak," katanya.

Kenyataan itu antara lain, turut memberitahu, CHF104 juta dipegang di Perbendaharaan Persekutuan Switzerland.

"Jumlah itu sebenarnya mewakili jumlah yang diperintahkan sebagai penyerahan kembali keuntungan oleh FINMA terhadap bank-bank tertentu kerana dakwaan melanggar undang-undang Switzerland. Oleh itu, CHF 104 juta itu adalah hasil denda oleh FINMA terhadap bank-bank tertentu," katanya.

Menurut 1MDB, Menteri Kewangan Switzerland, Ueli Maurer, berkata, bank-bank yang berkaitan telah membantah tindakan FINMA dan merayu tindakan berkenaan di Mahkamah Pentadbiran Persekutuan.

Menurutnya, Majlis Kebangsaan Switzerland juga berhak membahaskan sebarang usul yang dibentangkan dan membuat keputusan yang difikirkan bersesuaian oleh anggota-anggotanya.

"Ini kerana usul tersebut dinyatakan secara umum dan membabitkan pelbagai syarikat dan negara. Ia bukan satu usul khusus mengenai 1MDB atau Malaysia," katanya.

Sementara itu, Kementerian Kewangan dalam kenyataan menjelaskan, selepas beberapa siri audit dijalankan melibatkan agensi penguatkuasaan Malaysia termasuk Jawatankuasa Kira-Kira Wang Negara (PAC), Suruhanjaya Pencegahan Rasuah Malaysia (SPRM), Polis Diraja Malaysia, Peguam Negara dan agensi berkaitan menunjukkan tidak berlaku atau mengesan sebarang kehilangan dana daripada 1MDB.

"Jadi, adalah sukar bagi pihak kementerian untuk mengambil sebarang tindakan bagi membuat tuntutan daripada kerajaan Switzerland kerana wang tersebut bukan milik rakyat Malaysia seperti didakwa Wan Azizah dan Kit Siang dalam surat mereka kepada Ahli Parlimen Switzerland," katanya.

14 Mac 2018

14.7 penguat kuasa MPK ditahan terima rasuah RM1,000

KLANG 14 Mac - Tujuh anggota penguat kuasa Majlis Perbandaran Klang (MPK) hari ini ditahan Suruhanjaya Pencegahan Rasuah Malaysia (SPRM) dipercayai meminta dan menerima rasuah RM1,000 daripada seorang pengusaha kafe siber tanpa lesen di daerah ini.

Bagaimanapun, salah seorang daripada mereka dibebaskan dengan jaminan SPRM selepas dirakam percakapan, hari ini.

Menurut sumber, kesemua mereka berusia 31 hingga 42 tahun itu ditahan di Pejabat SPRM Cawangan Klang kira-kira pukul 1.45 petang tadi.

15 Mac 2018

15. Bekas pengurus dijel, denda, mengaku cuba terima rasuah

NOORASYIKIN A. LATIFF dihukum penjara dua hari dan denda RM50,000 atas tuduhan menerima rasuah wang tunai berjumlah daripada seorang pemilik butik bagi menyelesaikan kes jenayah membabitkan suaminya tahun lalu di Mahkamah Sesyen Kuala Lumpur hari ini.

KUALA LUMPUR 15 Mac - Seorang bekas pengurus pengarah syarikat kawalan keselamatan dihukum penjara dua hari dan denda RM50,000 oleh Mahkamah Sesyen di sini hari ini atas pertuduhan cuba menerima rasuah daripada seorang pemilik butik bagi menyelesaikan kes jenayah melibatkan suami mangsa, dua tahun lalu.

Hakim Azura Alwi menjatuhkan hukuman tersebut terhadap Noorasyikin A. Latiff, 40, selepas tertuduh menukar pengakuan kepada bersalah ketika prosiding perbicaraannya pada 15 Februari lalu dan hari ini ditetapkan untuk jatuh hukum.

Mengikut pertuduhan, tertuduh didakwa cuba menerima suapan wang tunai RM10,000 daripada Nur Aisyah Roling, melalui Mohd. Rozaini Radzi, sebagai dorongan untuknya membantu menyelesaikan kes suami Nur Aisyah iaitu Baharuddin Hamzah di pekarangan Restoran Victoria Station, Jalan Ampang, di sini pada pukul 3.30 petang, 15 Disember 2016.

Baharuddin yang merupakan ahli perniagaan didakwa pada 8 Disember 2016 di Mahkamah Sesyen Petaling Jaya atas lapan pertuduhan memperdagangkan lapan individu warga Indonesia untuk dijadikan pekerja restoran.

Pertuduhan terhadap Noorasyikin dikemukakan mengikut Seksyen 16(a)(A) Akta Suruhanjaya Pencegahan Rasuah Malaysia (SPRM) 2009 dibaca bersama Seksyen 28(1)(a) dan boleh dihukum di bawah Seksyen 24 akta sama yang membawa hukuman penjara maksimum 20 tahun dan denda tidak kurang daripada lima kali ganda nilai suapan atau RM10,000 mengikut mana lebih tinggi.

Terdahulu, peguam Munawar Kabir Zainal Abidin yang mewakili tertuduh memohon hukuman ringan dengan alasan anak guamnya melakukan perbuatan itu kerana berada dalam gangguan emosi dan tertekan.

"Anak guam saya juga menghidap penyakit kanser payudara dan perlu mendapatkan rawatan berkala di hospital selain merupakan pesalah pertama," katanya.

Sementara itu, Timbalan Pendakwa Raya daripada SPRM, Mohd. Asnawi Abu Hanipah memohon hukuman setimpal dengan mengambil kira mahkamah telah menghabiskan masa setahun empat bulan bagi menjalankan kes tersebut dengan tujuh saksi pendakwaan telah dipanggil untuk memberi keterangan.

Azura memerintahkan Noorasyikin menjalani hukuman penjara bermula hari ini selain tempoh dia dipenjarakan boleh ditambah lagi tiga tahun jika gagal membayar denda berkenaan.

Mengikut fakta kes, pada 30 Oktober 2016, tertuduh telah berjumpa dengan Nur Aisyah di pekarangan Ibu pejabat Imigresen, Putrajaya dan memberitahu bahawa jika wanita itu mahu kes terhadap suaminya diselesaikan, dia perlu memberi sejumlah wang.

Pada 15 Disember tahun sama, Nur Aisyah telah menyerahkan wang itu yang dimasukkannya ke dalam sebuah bungkus dokumen melalui Mohd. Rozaini yang diupah oleh tertuduh untuk mengambil dokumen itu.

15 Mac 2018

16. Dua lelaki didakwa beri suapan kepada penguat kuasa SWCorp

KUALA LUMPUR 15 Mac - Dua lelaki dihadapkan ke Mahkamah Sesyen di sini hari ini masing-masing atas pertuduhan memberi rasuah RM1,500 dan RM500 kepada seorang penguat kuasa Perbadanan Pengurusan Sisa Pepejal dan Pembersihan Awam (SWCorp), Oktober tahun lalu.

Pertuduhan terhadap kerani, S. Muthukumar, 47, dikemukakan di hadapan Hakim Allaudeen Ismail manakala pertuduhan terhadap pemandu jentera berat, P. Elangovan, 57, pula dikemukakan di hadapan Hakim Azura Alwi.

Hanya Elangovan yang mengaku bersalah atas pertuduhan terhadapnya dan dijatuhi hukuman penjara 14 hari serta denda RM10,000.

Mengikut pertuduhan, kedua-duanya didakwa memberikan suapan wang tunai keseluruhan berjumlah RM2,000 kepada Pegawai Penguat kuasa SWCorp, Mohd. Zaki Harry Susanto sebagai dorongan untuk tidak menutup kawasan tapak pelupusan sampah dan tindakan penguatkuasaan terhadap pemilik tapak pelupusan sampah haram kerana melakukan kesalahan di bawah Seksyen 71(1) Akta Pengurusan Sisa Pepejal dan Pembersihan Awam.

Kedua-dua kesalahan tersebut didakwa dilakukan di dua tapak pengasingan dan pelupusan sampah di Segambut di sini pada 12 Oktober tahun lalu.

Pertuduhan terhadap mereka dikemukakan oleh Pegawai Pendakwa dari Suruhanjaya Pencegahan Rasuah Malaysia (SPRM), Wan Ahmad Nidzam Wan Omar mengikut Seksyen 17(b) Akta SPM 2009 dan boleh dihukum bawah seksyen 24 akta sama yang memperuntukkan hukuman penjara maksimum 20 tahun dan denda tidak kurang lima kali ganda nilai suapan atau RM10,000 mengikut mana-mana lebih tinggi.

16 Mac 2018

**17.2 bekas pegawai kanan Felda diperintah bela diri
Dituduh pecah amanah libatkan dana lebih RM47 juta**

KUALA LUMPUR 16 Mac - Dua bekas pegawai kanan Lembaga Kemajuan Tanah Persekutuan (Felda) diperintah untuk membela diri oleh Mahkamah Sesyen di sini hari ini masing-masing atas dua pertuduhan melakukan pecah amanah dan bersubahat dalam perbuatan jenayah itu yang melibatkan dana Felda lebih RM47 juta, empat tahun lalu.



MUHAMMAD SUFI MAHBUB

Hakim Allaudeen Ismail memutuskan demikian terhadap bekas Pengarah Besar Felda, Datuk Faizoull Ahmad, 58, dan bekas Timbalan Pengarah Besar Sumber Strategik, Muhammad Sufi Mahbub, 54, selepas mendapat pihak pendakwaan berjaya membuktikan kes prima facie.

Mahkamah kemudian menetapkan lima hari bermula 23 Mac ini untuk kedua-dua tertuduh bela diri.

Pendakwaan dikendalikan oleh Timbalan Pendakwa Raya daripada Suruhanjaya Pencegahan Rasuah Malaysia (SPRM), Afzainizam Abdul Aziz manakala peguam A. Heather Marie mewakili Muhammad Sufi sementara Faizoull diwakili peguam Azad Bashir dan Fitra Qalbi Hatta M. Zin.

Mengikut kedua-dua pertuduhan, Muhammad Sufi didakwa sebagai orang yang telah diamanahkan penguasaan ke atas dana Felda telah melakukan pecah amanah dengan melupus dan meluluskan pembayaran RM25,999,000 dan RM21,625,500 tanpa kelulusan Lembaga Pengarah atau Jawatankuasa Tender Felda.



FAIZOULL AHMAD

Kelulusan itu dibuat menerusi perjanjian Technology Transfer and Supply Agreement dan Design-Build Contract Agreement dengan I2C Hassed Co. Ltd. dan I2C Hassed (M) Sdn. Bhd. melalui Felda Caviartive Sdn. Bhd.

Pertuduhan terhadap bapa tiga anak itu dikemukakan mengikut Seksyen 409 Kanun Keseksaan yang memperuntukkan hukuman penjara maksimum 20 tahun dan sebat serta boleh juga dikenakan denda.

Sementara itu, Faizoull pula didakwa bersabahat dengan Muhammad Sufi untuk melakukan perbuatan tersebut dan pertuduhan terhadapnya dikemukakan mengikut Seksyen 109 kanun sama dibaca bersama Seksyen 409 kanun tersebut yang memperuntukkan hukuman serupa.

Kesemua pertuduhan tersebut didakwa dilakukan di Bangunan Wisma Felda, Jalan Perumahan Gurney, di sini antara 13 Januari dan 23 Julai 2014.

Sebanyak 49 saksi dipanggil untuk memberi keterangan sepanjang perbicaraan di peringkat pendakwaan yang bermula pada 13 Jun 2017 hingga 13 Disember 2017.

18 Mac 2018

18. SPRM digesa siasat pengurusan air di Selangor

KUALA LUMPUR 18 Mac - Ahli Parlimen Kuala Selangor, Datuk Seri Dr. Irmohizam Ibrahim menggesa Suruhanjaya Pencegahan Rasuah Malaysia (SPRM) menyiasat sekiranya wujud sebarang kecuaian dalam pengurusan air di negeri Selangor.



IRMOHIZAM IBRAHIM

Menurut beliau, perkara itu berikutan pemberian bekalan air percuma sebanyak 20 meter padu oleh kerajaan negeri Selangor tidak seperti disangkakan kerana berkemungkinan menggunakan wang pelaburan Kerajaan Persekutuan.

Katanya, sebelum ini, kerajaan negeri Selangor dengan bangga menguar-uarkan kononnya mampu memberi bekalan air percuma sedangkan rakyat mengetahui RM14bilion diperuntukkan oleh Kerajaan Persekutuan bagi penstrukturkan semula air dan baik pulih di negeri itu.

"Kemungkinan `ada udang di sebalik batu' seperti didakwa oleh bekas Menteri Besar Selangor (Tan Sri Abdul Khalid Ibrahim) kerana gangguan bekalan air di negeri itu masih tidak menemui sebarang jalan penyelesaian yang konkret.

"Benarlah ada pepatah mengatakan `paku dulang paku serpih, mengata orang dia yang lebih," katanya dalam satu kenyataan, hari ini.

20 Mac 2018

19. Skandal Air: Mahkamah tetapkan bicara pada 3 April

KOTA KINABALU 20 Mac - Mahkamah Tinggi di sini menetapkan 3 April perbicaraan kes melibatkan bekas pengarah Jabatan Air Negeri Sabah (JANS) dan tiga lagi selepas menolak permohonan seorang daripada mereka untuk membatalkan pertuduhan terhadapnya.



TEO CHEE KEONG

Menurut Timbalan Pendaftar Dana Arabi Wazani, Hakim Datuk Nurchaya Arshad memutuskan keputusan itu dalam kamar selepas mendapati tidak ada merit dalam permohonan jenayah bekas timbalan pengarah JANS Teo Chee Kong yang bantahannya termasuk bagi perbicaraan bersama dan memohon Hakim Mahkamah Sesyen Abu Bakar Manat menarik diri daripada mendengar kes itu.

"Mengenai semakan jenayah bagi perbicaraan bersama dan penarikan diri Hakim Mahkamah Sesyen, Yang Arif (Nurchaya) memutuskan bahawa tidak ada kemungkinan dari segi berat sebelah di pihak Hakim Mahkamah Sesyen," kata Dana. Dana berkata, Nurchaya juga memerintahkan pihak pendakwaan daripada Suruhanjaya Pencegahan Rasuah Malaysia (SPRM) diketuai Tengku Amir Zaki Tengku Abdul

Rahman untuk mengemukakan rakaman visual kamera litar tertutup, buku pendaftaran lokap dan dokumen berkaitan semasa tempoh reman yang dipohon oleh Teo yang telah ditolak oleh Abu Bakar.

Teo, 52, yang diwakili peguam Roland Cheng, Nelson Anggang dan Ram Singh, menghadapi 146 pertuduhan pengubahan wang haram, membabitkan lebih RM32 juta, yang didakwa diperoleh melalui penyalahgunaan kuasa dalam pelaksanaan projek-projek yang dibiayai JANS antara 2010 dan 2016.

Dia menghadapi 78 pertuduhan dan didakwa mengikut Seksyen 4 (1) Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001 bagi pemilikan 70 keping tanah hasil aktiviti yang menyalahi undang-undang melalui 78 urus niaga, melibatkan RM12,705,203.

Baki 68 pertuduhan didakwa mengikut Seksyen 4(1) (b) Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001, enam daripadanya atas tuduhan memiliki wang tunai RM7,930,810 dan yang lain melibatkan RM12,287,240 dalam akaun bank di lapan institusi kewangan.

Teo akan dibicarakan bersama-sama dengan bekas pengarah JANS Awang Mohd Tahir Mohd Talib, 54, isterinya, Fauziah Piut, 51, dan bekas timbalan pengarah JANS Lim Lam Beng, 62, yang mengaku tidak bersalah atas 37 pertuduhan pengubahan wang haram membabitkan RM61.57 juta.

21 Mac 2018

20. SPRM tahan 6 individu Termasuk dua bergelar Datuk berhubung isu tanah Ijok



DZULKIFLI AHMAD bersama pelancong dalam program Gerakan Revolusi Antirasuah (Gerah) di sekitar Jonker Walk, Bandar Hilir Melaka, semalam.

MELAKA 20 Mac - Selepas hampir lima bulan melakukan siasatan berhubung isu penjualan tanah seluas 880 hektar di Ijok, Selangor kepada syarikat pemaju swasta pada harga RM1.18 bilion, Suruhanjaya Pencegahan Rasuah Malaysia (SPRM) mula bertindak dengan menahan enam individu termasuk dua yang bergelar Datuk hari ini.

Kesemua suspek yang berusia antara 34 dan 84 tahun yang dua daripadanya bapa dan anak ditahan di Petaling Jaya, Selangor serta Ibu pejabat SPRM Putrajaya bermula pukul 12.45 tengah hari hingga 4 petang bagi membantu siasatan isu tersebut.

Ketua Pesuruhjaya SPRM, Tan Sri Dzulkifli Ahmad berkata, lima daripada suspek merupakan pengarah di lima syarikat pemaju swasta di ibu negara dan Selangor manakala seorang lagi bekas pengarah.

Katanya, SPRM juga sedang mengesan seorang lagi pengarah syarikat bergelar Datuk yang dipercayai berada di luar negara.

"Siasatan SPRM melibatkan penerimaan bayaran menerusi transaksi wang kira-kira RM200 juta kepada lima syarikat iaitu masing-masing menerima kira-kira RM68 juta, RM62 juta, RM42 juta, RM16.5 juta, dan RM8.5 juta.

"Pasukan penyiasat juga telah membeku sembilan akaun peribadi dan syarikat bernilai RM39 juta milik kesemua suspek yang ditahan bagi membantu siasatan," katanya.

Beliau berkata demikian dalam sidang akhbar selepas mengadakan program walkabout berkaitan program Sahabat Gerakan Revolusi Antirasuah (Gerah) di Jonker Walk di sini hari ini.

Dalam program itu, Dzulkifli menyerahkan risalah berhubung mesej anti rasuah bagi meningkatkan kesedaran orang ramai mengenai jenayah tersebut secara berterusan.

Jelas beliau, kesemua tangkapan tidak melibatkan ahli politik dan SPRM akan mendapatkan perintah reman terhadap mereka esok .

"Kesemua mereka ditahan dan disiasat bawah Seksyen 23 Akta SPRM 2009," tambahnya.

Pada November lalu, dua pertubuhan bukan kerajaan iaitu Generation2u United Club dan Persatuan Pemuda Kampung Lindungan 565 membuat laporan kepada SPRM meminta siasatan dijalankan jika terdapat unsur rasuah berhubung isu tanah di mukim Ijok yang diberikan oleh kerajaan PKR Selangor kepada dua syarikat.

Tanah seluas 880 hektar itu dibeli oleh dua syarikat, LBCN Development Sdn. Bhd., dan Mujur Zaman Sdn. Bhd., pada 1998 namun dirampas kerajaan negeri itu pada 2008 mengikut Kanun Tanah Negara berikutan pelanggaran syarat dan terma perjanjian.

21 Mac 2018

21. Jam tangan mewah, barang kemas jenama Cartier jadi barang bukti

PEGAWAI SPRM membawa sebahagian barang mewah milik bekas Setiausaha Bahagian Kewangan Kementerian Belia dan Sukan, Otman Arsahd yang menghadapi 32 pertuduhan salah guna kedudukan dan mengemukakan tuntutan palsu berjumlah RM38.4 juta enam tahun lalu di Mahkamah Sesyen Kuala Lumpur, semalam. - utusan/zaini husin

KUALA LUMPUR 20 Mac - Sebanyak 13 utas jam tangan mewah dan beberapa jenis barang kemas dikemukakan di Mahkamah Sesyen di sini hari ini sebagai barang kes pada perbicaraan bekas Setiausaha Bahagian Kewangan Kementerian Belia dan Sukan (KBS), Otman Arsahd yang didakwa atas 32 pertuduhan salah guna kedudukan dan mengemukakan tuntutan palsu membabitkan RM38.4 juta, enam tahun lepas.

Kesemua jam tangan mewah dan barang kemas termasuk 23 bentuk cincin, lapan utas gelang tangan, dua pasang subang dan seutas rantai leher telah dikemukakan oleh saksi pendakwaan ke-49, Ketua Penolong Kanan Pengguna Suruhanjaya Pencegahan Rasuah Malaysia (SPRM), Asmawi Kulup Lam.

"Kesemua jam tangan dan barang kemas itu telah dicatatkan dalam borang sitaan yang dikeluarkan terhadap Otman ketika SPM menjalankan siasatan," katanya ketika menjawab soalan Timbalan Pendakwa Raya dari SPM, Husmarudin Husin pada pemeriksaan utama perbicaraan berkenaan.

Antara jenama jam tangan mewah yang disita ialah Cartier, Rolex dan Tag Heuer, manakala kebanyakan jenama barang kemas yang disita ialah Cartier.

Pada 21 April 2016, Otman, 59, yang diwakili peguam Muhammad Rafique Rashid Ali, didakwa atas 64 pertuduhan menerima wang berjumlah RM16,623,000 hasil daripada aktiviti haram ke dalam akaun Maybank, RHB dan CIMB Berhad melalui cek antara 7 Mac 2012 hingga 11 Disember 2015.

Terdahulu, pada prosiding pagi tadi, saksi pendakwaan ke-48, Timbalan Ketua Pengarah Operasi Jabatan Perumahan Negara, Yahya Ab. Ghani, 51, memberitahu, setiap permohonan bagi mendapatkan dana dari Kumpulan Wang Amanah Sukan Negara (KWASN) perlu disemak semula oleh pegawai pengawal iaitu ketua setiausaha sebelum peruntukan berkenaan disalurkan kepada pemohon.

Beliau yang pernah memegang jawatan sebagai setiausaha bahagian kewangan KBS pada April 2017 hingga September 2017 berkata, setiap permohonan yang telah diluluskan akan dimaklumkan secara bertulis kepada pemohon.

"Peruntukan yang diluluskan akan disalurkan atau dimasukkan secara electronic fund transfer (EFT)," katanya dan menambah setiap pemohon perlu menjalankan aktiviti sukan seperti yang dinyatakan dalam permohonan mereka dan mengemukakan laporan lengkap apabila program berkenaan selesai dijalankan.

Beliau berkata demikian pada pemeriksaan utama oleh Timbalan Pendakwa Raya dari SPRM, Norzilati Izhani Zainal.

Selain Otman, pengarah syarikat pembekal barang sukan di bawah KBS, Abdul Gafar Abdurahiman, 44; dan isterinya Siti Rohanah Hussien, 44, suri rumah; masing-masing berdepan 63 pertuduhan memindahkan wang berjumlah RM15,723,000 yang merupakan hasil daripada aktiviti haram menerusi 63 transaksi daripada akaun bank tiga syarikat milik mereka ke akaun bank milik Otman bagi tempoh masa yang sama.

Kesemua mereka didakwa melakukan kesalahan itu di beberapa lokasi berbeza, antaranya RHB Bank cawangan Presint 8, Putrajaya, Menara Maybank Jalan Tun Perak dan Maybank Jalan Raja Laut.

Otman, Abdul Gafar dan Siti Rohanah didakwa mengikut Seksyen 4(1)(a) Akta Pencegahan Pengubahan Wang Haram dan Pencegahan Pembiayaan Keganasan 2001 (AMLATFA) yang membawa hukuman denda maksimum RM5 juta atau penjara maksimum lima tahun atau kedua-duanya, jika sabit kesalahan.

Mereka juga didakwa mengikut Seksyen 4(1)(b) Akta Pencegahan Pengubahan Wang Haram dan Pencegahan Pembiayaan Keganasan Dan Hasil Daripada Aktiviti Haram 2001 (AMLATFAPUAA) yang membawa hukuman penjara sehingga 15 tahun atau boleh juga didenda tidak kurang daripada lima kali ganda jumlah atau nilai hasil daripada aktiviti haram, jika sabit kesalahan.

Abdul Gafar dan Siti Rohanah diwakili peguam Datuk Seri Jahaberdeen Mohamed Yunoos. Perbicaraan di hadapan Hakim Azura Alwi bersambung esok.

21 Mac 2018

22. Dipenjara lapan bulan

Bekas pengarah DBKL bersalah 8 tuduhan guna kedudukan

KUALA LUMPUR 20 Mac - Bekas Pengarah Eksekutif (Pengurusan Projek) Dewan Bandaraya Kuala Lumpur (DBKL), Datuk Seri Syed Afendy Ali Syed Abid Ali dihukum penjara lapan bulan dan denda RM80,000 oleh Mahkamah Sesyen di sini hari ini selepas didapati bersalah atas lapan pertuduhan menggunakan kedudukannya bagi mendapatkan lapan unit kondominium bernilai hampir RM2 juta untuk ahli keluarganya, lima tahun lalu.

Hakim Allaudeen Ismail memutuskan demikian ke atas Syed Afendy Ali, 56, setelah mendapati pihak pembelaan gagal menimbulkan keraguan munasabah terhadap kes pendakwaan.

Mengikut pertuduhan pertama hingga kelapan, tertuduh didakwa sebagai Pengarah Jabatan Perancangan Ekonomi dan Penyelarasan Pembangunan (JPEPP) DBKL telah mendapatkan suatu benda berharga dengan tiada balasan untuk ibunya, Minah Abdullah, 75; anak saudara, Mazwan Amin Mohd. Noor, 46; isterinya Rodziah Abd. Samad, 56; dan anaknya, Syed Ashraf Ali, 30.

Benda berharga tersebut iaitu kepentingan ke atas lapan unit kondominium, Astana Lumayan dan Suasana Lumayan di Bandar Sri Permaisuri, Bandar Tun Razak masing-masing bernilai RM249,000 berserta pakej naik taraf ke atas unit tersebut berjumlah RM447,000 daripada syarikat Danau Lumayan Sdn. Bhd. yang tertuduh mengetahui ada hubungan dengan kerja-kerja rasminya.

Kesemua kesalahan itu didakwa dilakukan di Pejabat JPEPP, DBKL di sini antara 6 September 2013 dan 16 Oktober 2014 dan dituduh mengikut Seksyen 165 Kanun Keseksaan yang memperuntukkan hukuman penjara maksimum dua tahun atau denda atau kedua-duanya.

Mahkamah bagaimanapun membenarkan penangguhan pelaksanaan hukuman penjara dan denda tersebut sementara menunggu rayuan selesai di Mahkamah Tinggi dengan mengekalkan wang jaminan RM1 juta berserta seorang penjamin selain pasport diserahkan ke mahkamah.

Allaudeen memerintahkan tertuduh menjalani hukuman penjara masing-masing lapan bulan dan denda RM10,000 bagi setiap pertuduhan serta berjalan serentak. Tertuduh turut berdepan hukuman penjara setahun bagi setiap pertuduhan sekiranya gagal membayar denda tersebut.

Sementara itu, tertuduh dilepas dan dibebaskan daripada pertuduhan mendapatkan Rodziah satu unit kedai pejabat tiga tingkat di Pusat Perdagangan Danau Lumayan Avenue, Jalan Danau Lumayan, Bandar Tun Razak bernilai RM930,000 daripada syarikat sama yang tertuduh mengetahui ada hubungan dengan kerja-kerja rasminya ketika itu sebagai Timbalan Bendahari di Jabatan Kewangan

DBKL di Pejabat Ketua Bahagian (Pembangunan dan Penswastaan) Jabatan Kewangan, DBKL pada 2 Mac 2009.

Mahkamah turut melepas dan membebaskan Syed Afendy Ali yang diwakili peguam, Hamidi Mohd. Noh daripada sembilan pertuduhan menerima dan menggunakan wang haram melibatkan RM1.5 juta mengikut Akta Pencegahan Pengubahan Wang Haram dan Pencegahan Pembiayaan Keganasan (AMLATFA) 2001.

Terdahulu, Timbalan Pendakwa Raya dari Suruhanjaya Pencegahan Rasuah Malaysia (SPRM), Ahmad Akram Gharib memohon hukuman setimpal dengan mengambil kira kepentingan awam selain tertuduh telah menyalahgunakan kedudukannya untuk kepentingan sendiri.

Syed Afendy Ali yang kelihatan sugul dan hanya tunduk di kandang tertuduh merayu hukuman ringan kepadanya atas alasan sejak dia ditangkap, dia telah hidup dalam keadaan susah.

"Saya telah hilang segala-galanya, hari ini tuan boleh lihat sendiri yang datang ke mahkamah hanya isteri dan anak saya. Saya telah hilang kawan-kawan. Dengan keadaan kesihatan saya (sakit jantung), saya kehilangan 20 kilogram berat badan sepanjang kes ini berlangsung.

"Saya memohon saya tidak dipenjarakan, jika denda pun, hutang saya sudah keliling pinggang," katanya dengan nada sebak selepas diarahkan Allaudeen untuk berkata sesuatu sebelum hukuman dijatuhkan.

22 Mac 2018

23. SPRM buka 40 kertas siasatan penjawat awam di Perak

AZIZUL RAHMAN MOHAMMAD (tengah) menyerahkan dokumen ikrar bebas rasuah kepada Ahmad Sukri Mohamad Taib sempena majlis Melafaz dan Menandatangani Ikrar Bebas Rasuah di Ipoh, Perak semalam

IPOH 21 Mac - Sebanyak 40 kertas siasatan telah dibuka Suruhanjaya Pencegahan Rasuah Malaysia (SPRM) terhadap penjawat awam di negeri ini sejak Januari tahun lalu sehingga Mac ini.

Timbalan Pengarah (Pencegahan) Suruhanjaya Pencegahan Rasuah Malaysia (SPRM) negeri, Ahmad Shukri Mohamad Taib berkata, dalam tempoh tersebut, pihaknya telah menahan 10 individu dengan tujuh daripadamereka telah didakwa di mahkamah.

"Sepanjang tahun lalu kita telah membuka 56 kertas siasatan melibatkan rasuah iaitu 35 daripadanya membabitkan penjawat awam di negeri ini.

"Bagi tempoh tiga bulan pertama tahun ini, lima kertas siasatan telah dibuka namun masih belum ada tangkapan dilakukan setakat ini," katanya.

Beliau berkata demikian kepada pemberita selepas majlis Melafaz dan Menandatangani Ikrar Bebas Rasuah (IBR) Perbadanan Setiausaha Kerajaan Negeri Perak (SSI) di Bilik Mesyuarat Amanjaya Menara SSI di sini hari ini.

Yang turut hadir, Ketua Pegawai Eksekutif SSI, Azizul Rahman Mohammad.

Ahmad Shukri berkata, penglibatan penjawat awam dalam salah laku rasuah di negeri ini disifatkan masih berada pada tahap yang rendah.

Katanya, kes-kes yang dilaporkan kepada SPRM negeri juga kebanyakannya melibatkan jumlah rasuah yang kecil dan lebih tertumpu kepada golongan penguat kuasa.

"Di Perak, kes yang melibatkan kakitangan kerajaan agak kurang. Salah satu faktornya mungkin disebabkan pelbagai program yang dilaksanakan kerajaan negeri termasuk Pemukiman Menteri Besar.

"Menerusi program seperti itu masyarakat tahu bahawa potensi untuk melakukan salah laku itu agak sukar dan tertutup," katanya.

Dalam perkembangan sama, beliau berkata, sebanyak 130 jabatan dan agensi daripada pelbagai sektor seperti kerajaan, swasta, pertubuhan bukan kerajaan (NGO) dan politik di negeri ini telah menandatangi dan melafazkan IBR tahun lalu.

"Bermula Januari hingga tahun ini, jumlah jabatan dan agensi melaksanakan program yang sama adalah sebanyak 18 buah," kata beliau.

22 Mac 2018

24. Tanah Ijok: Seorang lagi suspek bergelar Datuk direman

SEORANG pengarah syarikat bergelar Datuk direman selama tujuh hari bermula hari ini bagi membantu siasatan Suruhanjaya Pencegahan Rasuah Malaysia (SPRM) berhubung skandal penjualan tanah di mukim Ijok, Selangor.

PUTRAJAYA 22 Mac- Seorang pengarah syarikat bergelar Datuk menjadi individu ketujuh direman bagi membantu siasatan berhubung skandal penjualan tanah milik kerajaan Selangor di mukim Ijok.

Perintah reman selama tujuh hari bermula hari ini itu dikeluarkan oleh Majistret Ainna Sherina Saipolamin selepas membenarkan permohonan Suruhanjaya Pencegahan Rasuah Malaysia (SPRM).

Suspek yang berumur 53 tahun itu ditahan pada pukul 6 petang di Ibu Pejabat SPRM di sini semalam selepas hadir untuk memberi keterangan, sebelum ini pengarah syarikat tersebut berada di luar negara.

Selain tangkapan, difahamkan SPRM turut membekukan 34 akaun bank yang bernilai RM47 juta sekali gus menjadikan jumlah aset yang dibekukan berhubung kes itu sejak Isnin lalu sebanyak RM86 juta.

Semalam, Pengarah Kanan Jabatan Siasatan SPRM, Datuk Simi Abd. Ghani mengesahkan penahanan suspek dan memaklumkan kes disiasat di bawah Seksyen 16(A) Akta SPRM 2009.

Terdahulu semalam, enam individu termasuk dua lelaki bergelar Datuk direman selama empat hari sehingga Sabtu ini berhubung isu penjualan tanah seluas 880 hektar kepada pemaju swasta pada harga RM1.18 bilion.

Suspek yang berumur antara 34 tahun dan 84 tahun itu ditahan di Petaling Jaya, Selangor dan Ibu Pejabat SPRM Putrajaya, di antara jam 12.45 tengah hari dan 4 petang semalam, antara yang ditahan adalah bapa dan anak lelaki.

Pasukan penyiasat juga membekukan sembilan akaun peribadi dan syarikat bernilai RM39 juta milik semua suspek yang ditahan.

Ketika ini, siasatan SPRM merangkumi penerimaan bayaran menerusi transaksi wang kira-kira RM200 juta kepada lima syarikat iaitu masing-masing menerima lebih kurang RM68 juta, RM62 juta, RM42 juta, RM16.5 juta dan RM8.5 juta.

Penjualan tanah seluas 880 hektar kepada syarikat pemaju swasta pada harga RM1.18 bilion itu menimbulkan kontroversi dan dipersoalkan pelbagai pihak, termasuk peneroka

24 Mac 2018

25. Skandal tanah Ijok: Tempoh reman empat suspek disambung, dua lagi bebas



TEMPOH reman empat lelaki termasuk seorang lelaki bergelar Datuk disambung empat hari bagi membantu siasatan skandal penjualan tanah di mukim Ijok, Selangor manakala dua lagi suspek dibebaskan dengan jaminan RM20,000.

PUTRAJAYA 24 Mac- Tempoh reman empat suspek termasuk seorang lelaki bergelar Datuk disambung selama empat hari bermula esok sehingga Rabu ini bagi membantu siasatan skandal penjualan tanah milik kerajaan Selangor di mukim Ijok.

Majistret Nik Muhammad Hafiz Nik Mahmood membenarkan permohonan Suruhanjaya Pencegahan Rasuah Malaysia (SPRM) untuk menyiasat keempat-empat suspek itu selain membebaskan dua individu termasuk seorang Datuk dengan jaminan RM20,000 setiap seorang.

Terdahulu keenam-enam suspek berkenaan tiba di Mahkamah Majistret di sini dengan memakai baju lokap SPRM dalam keadaan tangan bergari kira-kira pukul 9.50 pagi.

Pada Selasa lalu, keenam-enam suspek it direman selama empat hari bagi membantu siasatan SPRM bagi membantu siasatan skandal penjualan tanah di mukim Ijok itu.

Penjualan tanah seluas 880 hektar kepada syarikat pemaju swasta pada harga RM1.18 bilion itu mencetuskan kontroversi dan menimbulkan persoalan pelbagai pihak termasuk peneroka.

Pada 22 Februari lalu, SPRM dilaporkan menyerbu lima syarikat dan merampas beberapa dokumen berkaitan isu penjualan tanah seluas kira-kira 800 hektar di Ijok kepada syarikat pemaju swasta pada harga RM1.18 billion.

Ketua Pesuruhjaya SPRM, Tan Sri Dzulkifli Ahmad, berkata, siasatan pihaknya merangkumi penerimaan bayaran menerusi transaksi wang kira-kira RM200 juta kepada lima syarikat iaitu masing-masing menerima lebih kurang RM68 juta, RM62 juta, RM42 juta, RM16.5 juta dan RM8.5 juta.

25 Mac 2018

26. Isu tanah Ijok: Azmin jangan hanya berdiam diri

TANJONG KARANG 24 Mac - Menteri Besar Selangor, Datuk Seri Mohamed Azmin tidak perlu bersikap berdiam diri daripada menjawab persoalan rakyat mengenai skandal penjualan tanah seluas 880 hektar di mukim Ijok berjumlah RM1.18 bilion.

**IRMOHIZAM IBRAHIM**

Walaupun kes penjualan tanah ketika ini dalam siasatan Suruhanjaya Pencegahan Rasuah Malaysia (SPRM), namun Mohamed Azmin sedikit sebanyak perlu memberi penjelasan mengenai isu itu kerana ia mencetuskan pelbagai tanda tanya kepada rakyat Selangor yang mempersoalkan prinsip ketelusan serta integriti kerajaan negeri.

Ahli Parlimen Kuala Selangor, Datuk Seri Dr. Irmohizam Ibrahim berkata, Menteri Besar Selangor itu tidak boleh menganggap isu berkenaan sebagai perkara tidak ada kena mengena dengan kerajaan negeri.

"Ini kerana di peringkat awal lagi tanah yang dikatakan sepatutnya milik rakyat Selangor itu dilapor diserahkan semula kepada dua syarikat pemaju yang terlibat sebelum ini," katanya.

Malah, katanya kerajaan negeri dilaporkan turut bertanggungjawab merangka penyelesaian tanah tersebut dengan syarikat pemaju terlibat termasuk menyelesaikan mengenai isu pampasan kepada peneroka.

"Sikap berdiam diri kerajaan negeri dalam isu tanah Ijok ini akan menambahkan lagi tanda tanya kepada rakyat. Apa yang ingin disembunyikan Menteri Besar sehingga timbulnya dakwaan ada pihak

ketiga turut menerima bayaran urus niaga penjualan tanah itu," katanya kepada Mingguan Malaysia di sini hari ini.

Semalam, Timbalan Pengarah Pasukan Komunikasi Strategik Barisan Nasional (BN), Eric See-To menggesa kerajaan PKR Selangor mendedahkan perkara sebenar tentang wujudnya pihak ketiga menerima bayaran sehingga RM262.7 juta daripada RM1.18 bilion hasil penjualan tanah di mukim Ijok pada Ogos 2017.

Dakwa See-To, pembayaran itu dilihat menyamai bayaran pampasan kepada peneroka asal tanah berkenaan berjumlah RM300 juta.

Terdahulu, Irmohizam yang juga Komander Kehormat Pasukan Simpanan Sukarela Tentera Laut Diraja Malaysia (PSSTLDM) merasmikan Program Jiwa Murni membaik pulih Jeti Nelayan Kampung Bagan Pasir di sini.

Program itu merupakan kerjasama strategik di bawah Strategi Lautan Biru Kebangsaan (NBOS) membabitkan Lembaga Kemajuan Ikan Malaysia (LKIM) dan Tentera Laut Diraja Malaysia (TLDM).

26 Mac 2018

27. SPRM tahan Pengarah Jabatan Perkhidmatan Veterinar Perlis

KUALA LUMPUR 26 Mac - Suruhanjaya Pencegahan Rasuah Malaysia (SPRM) Perlis hari ini menahan seorang doktor yang juga Pengarah Jabatan Perkhidmatan Veterinar Perlis kerana menyalahgunakan kedudukannya dengan terlibat dalam salah guna kuasa dan rasuah sebanyak RM9,600.

Suspek berusia 44 tahun itu telah meluluskan lesen 'Perlادangan Unggas dan Aktiviti Lain' atas nama dua syarikat yang dikatakan tidak mengikut prosedur yang ditetapkan.

Menurut sumber, pengarah tersebut telah menerima suapan dengan menduduki rumah sewa milik pemilik syarikat tersebut tanpa membayar duit sewa sejak November 2016 hingga November 2017.

"Turut ditangkap bagi membantu siasatan adalah pemilik syarikat itu yang berusia 39 tahun," kata sumber terbabit, di sini hari ini.

Pengarah SPRM Perlis, Mohd. Shukor Mahmud mengesahkan tangkapan itu.

27 Mac 2018

28. Guan Eng, Li Koon didakwa

SPRM akan buktikan mereka tandatangan jual beli harta tanah, banglo



LIM GUAN ENG bersama isterinya, Betty Chew Gek Cheng hadir untuk perbicaraan kes rasuah dan penyalahgunaan kuasa di Mahkamah Tinggi, Georgetown, Pulau Pinang, semalam

PULAU PINANG 26 Mac - Ketua Menteri, Lim Guan Eng dan ahli perniagaan, Phang Li Koon telah menandatangani perjanjian jual beli lot tanah dan banglo pada harga belian RM2.8 juta walhal nilai semasa harta tanah berkenaan adalah RM4.27 juta.

Perkara tersebut dinyatakan oleh pihak pendakwaan dalam ucapan pembukaan yang dibacakan oleh Timbalan Pendakwa Raya daripada Suruhanjaya Pencegahan Rasuah Malaysia (SPRM), Abdul Rashid Daud pada perbicaraan kes rasuah Guan Eng dan Li Koon di Mahkamah Tinggi di sini yang bermula hari ini.

Pihak pendakwaan turut menyatakan akan membuktikan Guan Eng telah membayar duti setem berjumlah RM122,100 atas nilai harta tanah RM4.27 juta pada 8 September 2015.

Keterangan juga menunjukkan pada 28 Julai 2015, Guan Eng, 58, yang dinamakan sebagai tertuduh pertama dan Li Koon tertuduh kedua telah menandatangani Perjanjian Jual/Beli bagi lot tanah dan rumah di No. 25, Jalan Pinhorn, George Town, di sini pada harga belian RM2.8 juta walhal nilai semasa bagi harta tanah itu adalah RM4.27 juta.

Guan Eng mengetahui, harga belian RM2.8 juta adalah di bawah harga nilai dan/atau harga pasaran selain mengetahui Li Koon mempunyai hubungan dengan tugas-tugas rasminya.

Mahkamah juga akan didedahkan dengan keterangan yang menunjukkan Li Koon telah bersubahat dengan Guan Eng untuk mendapatkan lot tanah dan rumah itu.

Abdul Rashid berkata, pihak pendakwaan akan menunjukkan, sebagai seorang penjawat awam iaitu Ketua Menteri Pulau Pinang telah menerima barang berharga iaitu lot tanah dan rumah itu dengan suatu balasan yang diketahui tidak mencukupi daripada Li Koon yang mempunyai hubungan dengan kerja-kerja rasmi beliau.

Menurut beliau, pihaknya akan membuktikan yang Li Koon telah membeli hartanah tersebut pada 2008 dengan harga RM2.5 juta dengan ansuran kepada Public Bank Bhd. sebanyak RM11,872 sebulan.

Saksi pendakwaan akan mengemukakan keterangan yang menunjukkan Guan Eng dan isterinya, Betty Chew Gek Cheng telah menyewa rumah tersebut daripada Li Koon sejak 2009 hingga 2015 dengan bayaran RM5,000 sebulan.

Keterangan akan menunjukkan Li Koon mengalami kerugian RM6,872 sebulan dan jumlah kerugian selama tempoh sewaan Guan Eng sejak Julai 2009 hingga Jun 2015 berjumlah RM494,784.

Abdul Rashid menyatakan, keterangan akan menunjukkan kedua-dua tertuduh telah menandatangani perjanjian tambahan/pilihan bertarikh 23 Jun 2014 dan Guan Eng telah membuat bayaran melalui cek RM100,000 bagi membolehkan beliau diberikan pilihan untuk membeli rumah itu pada harga RM2.8 juta.

Kata beliau, pihaknya juga akan mengemukakan keterangan yang menunjukkan Guan Eng selaku Penggerusi Jawatankuasa Perancang Negeri telah terlibat meluluskan permohonan Magnificent Emblem Sdn. Bhd. (MESB) bagi projek perlindungan semula Zon Pertanian kepada Zon Perumahan Am untuk Lot. 436 dan 437 Mukim J, Daerah Barat Daya, Pulau Pinang.

Katanya, keterangan saksi-saksi akan mengesahkan bahawa semasa mesyuarat, ahli-ahli tetap Jawatankuasa Perancang Negeri termasuk Guan Eng telah menerima kertas kerja berhubung projek tersebut yang mengandungi maklumat syarikat dan ahli lembaga pengarah MESB termasuk Li Koon yang merupakan seorang daripada pengarah syarikat itu.

Pihak pendakwaan menyatakan, ketika keputusan mesyuarat itu dibuat, Guan Eng tidak mengisyiharkan hubungan dan kepentingan bahawa beliau sedang menyewa rumah Li Koon.

Sebelum perbicaraan dimulakan, Guan Eng dan Li Koon masing-masing mengaku tidak bersalah terhadap pertuduhan pindaan yang dikemukakan oleh pihak pendakwaan.

27 Mac 2018

29. Pengarah perkhidmatan veterinar Perlis direman empat hari

PENGARAH Perkhidmatan Veterinar Perlis dan seorang pemilik sebuah syarikat diiringi pegawai Suruhanjaya Pencegahan Rasuah Malaysia (SPRM) dibawa keluar dari mahkamah selepas mendapat perintah reman bagi membantu siasatan dakwaan rasuah dan salah guna kuasa di Mahkamah Kangar hari ini.

KANGAR 27 Mac - Pengarah Perkhidmatan Veterinar negeri yang ditahan Suruhanjaya Pencegahan Rasuah Malaysia (SPRM) semalam bagi membantu siasatan kerana menyalahgunakan kedudukannya dengan terlibat dalam salah guna kuasa dan rasuah, direman selama empat hari bermula hari ini.

Turut direman selama empat hari ialah seorang pemilik sebuah syarikat menjual makanan sejuk beku.

Kedua-duanya hadir di perkarangan Mahkamah Sesyen di sini, kira-kira pukul 10.30 pagi dengan pengarah tersebut memakai baju kemeja berwarna putih dan pemilik syarikat itu, kemeja T berwarna merah dengan diiringi pegawai SPRM.

Penjawat awam berusia 44 tahun itu disiasat di bawah Seksyen 17a Akta SPRM 2009 manakala pemilik syarikat berusia 39 tahun itu pula di bawah Akta 16b akta yang sama.

Perintah tahanan reman tersebut dikeluarkan oleh Hakim Mahkamah Sesyen, Rusita Md. Lazim.

Kes tersebut menjadikan seramai dua orang pengarah agensi kerajaan negeri ini ditahan SPRM dalam tempoh kira-kira dua bulan.

Pada 29 Januari lalu, Pengarah Jabatan Pengairan dan Saliran (JPS) Perlis bersama dua pengarah syarikat yang juga kontraktor direman bagi membantu siasatan kes salah guna kuasa dan suapan bernilai hampir RM4 juta.

Semalam SPRM negeri menahan seorang doktor yang juga Pengarah Jabatan Perkhidmatan Veterinar negeri bagi membantu siasatan kerana menyalahgunakan kedudukannya dengan terlibat dalam salah guna kuasa dan rasuah sebanyak RM9,600.

Penjawat awam itu dikatakan telah meluluskan lesen 'Perlادangan Unggas dan Aktiviti Lain' atas nama dua syarikat yang difahamkan tidak mengikut prosedur yang ditetapkan.

Menurut sumber, pengarah tersebut telah menerima suapan dengan menduduki rumah sewa milik pemilik syarikat tersebut tanpa membayar duit sewa sejak November 2016 hingga November 2017.

Turut ditangkap bagi membantu siasatan adalah seorang pemilik syarikat itu.

29 Mac 2018

30. Bekas koperal tentera pecah amanah dijel 30 bulan, 79 sebatan

MELAKA 29 Mac - Seorang bekas anggota tentera berpangkat koperal dihukum penjara 30 bulan dan 79 sebatan oleh Mahkamah Sesyen di sini hari ini setelah mengaku bersalah terhadap 79 tuduhan menyalahgunakan peruntukan pembayaran elaun anggota sebuah pusat latihan di Kem Sungai Udang, dua tahun lalu.



BEKAS tentera berpangkat koperal Musa Md Dawi, 28, dijatuhi hukuman penjara 30 bulan dan 79 sebatan oleh Mahkamah Sesyen Melaka hari ini, atas 79 tuduhan menyalahgunakan peruntukan Pusat Latihan Peperangan Khusus (PULPAK), Kem Sungai Udang berjumlah RM50,238.10 dua tahun lepas.

Musa Md. Dawi, 28, dijatuhi hukuman tersebut oleh Hakim Datuk Mohd. Nasir Nordin setelah dia menukar pengakuan daripada tidak bersalah dan minta dibicarakan semasa pertama kali dihadapkan ke mahkamah pada 16 Mei tahun lalu.

Mahkamah menjatuhkan hukuman penjara 30 bulan dan sebatan sekali bagi setiap pertuduhan dan diperintahkan berjalan serentak bermula dari hari ini.

Mengikut pertuduhan, kerani gaji di Bahagian Sel Belanjawan Pusat Latihan Peperangan Khusus (Pulpak) itu didakwa dengan curangnya menyalahgunakan peruntukan pembayaran elaun perjalanan dan cuti dengan mencipta 43 baucar bayaran bagi 79 penama kononnya anggota bertugas di pusat latihan tersebut sebanyak RM50,238.10.

Daripada jumlah itu, sebanyak RM46,281.10 telah dimasukkan ke dalam akaun CIMB dan Maybank miliknya manakala baki dimasukkan ke dalam akaun dua individu lain.

Dia didakwa melakukan kesalahan itu di Pejabat Belanjawan Pulpak, Kem Sungai Udang di sini antara 25 April dan 1 Julai 2016.

Kesemua pertuduhan dikemukakan mengikut Seksyen 403 Kanun Keseksaan yang memperuntukkan hukuman penjara maksimum lima tahun dan sebatan serta denda.

Musa yang tidak diwakili peguam sebelum itu memohon hukuman ke atasnya diringankan dengan alasan dia perlu menanggung isteri, ibu serta ayahnya yang menghidap sakit jantung.

Timbalan Pendakwa Raya daripada Suruhanjaya Pencegahan Rasuah Malaysia (SPRM), Irwan Shah Abdul Samat yang mengendalikan pendakwaan bagaimanapun mencadangkan hukuman berat dikenakan dengan mengambil kira kegagalan tertuduh menggalas tanggungjawab yang diamanahkan dan mengganggu gugat keyakinan orang ramai terhadap pasukan keselamatan negara.

Tambahnya, Musa yang pertama kali dihadapkan ke mahkamah pada Mei tahun lalu juga telah mlarikan diri dan gagal hadir ke mahkamah untuk perbicaraan sehingga waran tangkap dikeluarkan, sekali gus menyusahkan banyak pihak selain melibatkan kos tambahan untuk mencarinya.


30 Mac 2018

31. DBKL disaran audit jejantas awam



Keratan Utusan Malaysia 22 Mac 2018.

KUALA LUMPUR 29Mac - Dewan Bandaraya Kuala Lumpur (DBKL) disaran melakukan audit secara menyeluruh ke atas semua jejantas awam di bawah penyelenggaraannya terutama di kawasan yang sering menjadi tumpuan.



LEE LAM THYE

Aktivis masyarakat, Tan Sri Lee Lam Thye berkata, pemeriksaan tahap keselamatan jejantas perlu dilakukan sekoran kemudahan untuk melintas jalan itu tidak digunakan oleh warga kota.

Beliau yang juga bekas Ahli Lembaga Penasihat DBKL berkata, keadaan kotor selain menjadi 'sarang' pengemis dan gelandangan menyebabkan orang ramai tidak selesa untuk menggunakaninya.

"Kebanyakan jejantas juga berada dalam keadaan gelap akibat perbuatan individu tidak bertanggungjawab merosakkan lampu yang dipasang di situ.

"Diharap DBKL dapat mengenalpasti jejantas yang berisiko dan membuat penyelenggaraan segera agar orang ramai boleh terus memanfaatkan kemudahan itu sekali gus mengurangkan kesesakan lalu lintas akibat tabiat pejalan kaki yang gemar

"menyeberangi jalan tanpa menggunakan jejantas," katanya kepada Utusan Malaysia di sini baru-baru ini.

Beliau berkata demikian bagi mengulas pendedahan Utusan Malaysia baru-baru ini berhubung keengganan warga kota memanfaatkan penggunaan jejantas di beberapa laluan sibuk ibu negara.

Sementara itu, Timbalan Pengarah Kanan Penguatkuasa DBKL, Osman Ismail berkata, tindakan penguatkuasaan terhadap pejalan kaki yang enggan menggunakan jejantas dilakukan secara berterusan.

Katanya, kesalahan tersebut sering dilakukan oleh warga asing terutamanya warganegara Indonesia yang terbawa-bawa budaya melintas jalan raya tanpa menggunakan jejantas dari negara mereka.

"Kompaun RM30 dikenakan serta-merta kepada pesalah. DBKL juga memasang alat penghadang anti-melintas sepanjang 20 meter bagi mengekang orang ramai daripada menyeberangi jalan tanpa menggunakan jejantas.

"Antara kawasan yang menjadi tumpuan DBKL adalah di sekitar Jalan Brickfields, Jalan Bukit Bintang, Jalan Imbi dan Jalan Tun Tan Cheng Lock," katanya.